

東
華
續
錄

東華續錄

嘉慶二十八

臣王先謙敬編

臣周綱著恭校

秋七月己未朔諭前因直隸肥鄉縣知縣萬永福違例投遞奏摺解任來京詢出天津差務派該縣出戲技銀三千兩係前任總督發行簡藩司慶格派定章程溫承惠等循照辦理特降旨令慶格明白回奏茲據奏稱會分派冀州肥鄉深澤平山四州縣三千二千及一千餘兩不等辦理不善自請交部從重懲處等語朕巡幸淀津閱視隄工省方問俗地方官修治道路豫備一切分所當然乃伊等以戲技爲名分攤屬員形諸文札濫派虛糜莫此爲甚除褫行簡業經身故外慶格著交部嚴加議處尋議降四級調用從之○諭昨據已革山陽縣令王伸漢供認謀毒情實爲從來未有

之事王仲漢承辦賑務捏開浮冒從中侵飽甚至將不肯扶同舞弊之委員李毓昌起意毒害實屬兇狡李毓昌詢無子息今王仲漢將伊謀斃不獨害其身抑且絕其嗣情尤可慘著將王仲漢任所原籍家產鈔沒伊見有幾子查明年歲俱發往伊犁交該將軍分置各城以洩幽憤又諭昨據已革山陽縣令王仲漢供查賑各員分肥飽囊均屬目無法紀所有得銀之同知林永陞從九品溫南峰州同龔國烜訓導言姓知事余姓俱著革職拏問一面將任所原籍貲財查鈔一面派員押解來京歸案審辦其餘五員著鐵保秉公確查如亦有侵蝕情弊一併嚴參卽照此辦理○庚申諭連日訊問已革山陽縣令王仲漢等業經供認謀毒情節見在按例定擬前據朱錫爵奏將李毓昌屍棺提至省垣於檢驗後封貯派員看守等語今王仲漢等既已供吐實情則李毓昌屍骨萬無

再檢之理著吉綸卽委妥員將該故員屍棺加槨妥協送回卽交伊家屬收領沿途官爲照料將來定案時尙當另有恩旨至李毓昌近支弟兄子姪尙有何人李泰清係何服制李毓昌之妻見依何親族同居如何度日俱著吉綸詳細確查具奏候朕酌加恩卹

○詔停本年秋決○甲子以同興爲安徽布政使岳慶爲雲南按

察使

由浙江杭嘉湖道遷

○乙丑諭軍機大臣等據給事中花杰奏前此該

給事中奏嚴催長蘆商人積欠一摺戶部議覆之奏係戴衢亨一

人主橐因戴衢亨與查有圻兒女嫻親於商人未納官租未交窩

價緣由並未詳悉根究並聞查有圻札致長蘆綱總任秉衡宋思

德馮錦及代辦之樊宗清等有積欠可以不交窩價可以不還前

已與大農言明之語見在該鹽政難以議覆等語前此戶部議覆

原摺係請將積欠一項交新任鹽政統覈通綱情形併限辦理窩

價一項因行查內務府無據議令該商等上緊湊繳與該給事中
所聞不符何以該給事中稱查有圻札致長蘆商總已與大農言
明有可以不交積欠窩價之語見詢之戴衢亨據稱並無此言但
查有圻有無此信不可不詳查確實刻又覆詢花杰據稱止須問
之綱總馮錦便知除派徵瑞前往天津與額勒布會同確查鹽務
情形再令查詢外著額勒布就近卽向綱總馮錦等數人切實詢
問如查有圻果有此事令其據實呈出卽行密封速奏無得隱飾
再嚴詢馮錦平素與給事中花杰有往來之蹤迹否將此諭令知
之○丙寅諭言官有奏事之責如果大臣中有得賄婪贓徇私舞
弊者自當據實糾彈不容緘默朕必徹底嚴查正其負恩誤國之
罪若竟係憑空無據之言豈能任其詆誣不加懲究給事中花杰
前經奏請嚴催長蘆商欠一事已交戶部議覆請交新任鹽政嚴

辦上月二十六日復據該給事中奏稱戶部議摺係戴衢亨一人主豪緣戴衢亨與查有圻係兒女姍親查有圻引地最廣積欠最多是以代爲徇庇將蘆商積欠官帑未交窩價均未詳悉根究並稱戴衢亨平日於言官冒瀆聖躬者則以爲直言於干涉部臣者則以爲多事等語朕當卽召見花杰面加詢問以所奏關繫甚大辦理必須實據如所奏不實亦有反坐之罪花杰除叩頭之外默無一言昨日復據該給事中具摺覆參備陳戴衢亨與查有圻結姍之後查有圻餽送往來饋營甚巧蘆商惟查有圻是望查有圻惟戴衢亨是倚以致鹽務廢弛言之鑿鑿而另摺又言戴衢亨於本年殿試閱卷顛倒舞弊將洪瑩援引爲一甲第一名進士該給事中曾令一同鄉庶吉士周際釗向戴衢亨私宅查閱門簿探問管門之人得其交通情狀又黃中模策寫俱佳不列入十卷之內

黃旭行楷相閒竟置二甲之中指爲舞弊實據等語朕因特派大學士慶桂董誥祿康尙書蘇楞額傳旨向戴衢亨詢問令其明白登答戴衢亨回奏之摺陳辦甚明所有長蘆商欠一事係交該鹽政統覈通網情形併限辦理窩價亦並令該商上緊湊繳皆屬嚴催辦理與花杰所奏不符至戴衢亨因司官辦稟未妥並恐書吏等有招搖情事是以與眾堂官商定主見之後卽令司官等在園明園改辦奏稟期於密速亦並非戴衢亨一人定議花杰所奏均屬不實惟戴衢亨欲辦理慎密亦儘可令司官等在署內封閉辦理何必令其在園此一節究屬不合致招物議見據戴衢亨自認疏率懇請處分自有應得之咎戴衢亨著交部議處至於戴衢亨與查有圻聯端之處查有圻本係宦家與戴衢亨向有世誼並非門戶卑微不可爲婚之人安得謂之有心援繫至於端戚往來歲

時餽送本屬情事之常人孰能免如果因有公事屬託納賄行私確有證據則亦無論其爲媼戚與否皆當繩之以法今戴衢亨於議覆長蘆積欠毫無護庇且先於議駁加價以二文入官一文歸商一節於查有圻大無利益公事公辦又何能禁其親戚之不相往來至於此外如戴衢亨因蓋房屋查有圻幫助木料借用桌几以及在南城外置買房屋數處尤爲瑣細不足置問花杰逞其筆端輒稱查有圻鑽營結納戴衢亨納賄徇私指查有圻爲倚勢把持之奸商坐戴衢亨以負恩誤國之重罪連篇累牘極力詆謗甚至謂戴衢亨於言官冒瀆聖躬者以爲直言此尤關係重大今確加根訊據花杰指稱嘉慶十一年在御史吳榮光家與戴衢亨之姪戴嘉穀會席談及吳榮光有請暫緩巡幸天津之摺係奉旨申飭者戴嘉穀曾云伊叔甚爲欽佩此語並非出於戴衢亨之口入

於花杰之耳而見在傳詢戴嘉穀堅稱伊因眾人稱讚亦止隨口應酬實無有伊叔戴衡亨欽佩之語復經慶桂等傳到是日同席之朱涂切加詢問亦稱不記此言其所稱戴衡亨於言官干涉部務者以爲多事一節則云卽係伊嚴催積欠之奏戴衡亨不以爲然若果以爲多事見今據摺催欠並未駁斥原奏如此肆意摭拾茫無指證是竟欲以莫須有之事妄興大獄矣至於殿試爲掄英大典科場舞弊律有明條若果如花杰所言戴衡亨與洪瑩交結情密援引爲一甲一名進士於黃中模黃旭顛倒列置此是何等弊竇何項罪名其告誣者應如何坐罪該給事中摺內且云請將洪瑩復加考試或默寫策對若實係平常請嚴究弊端而於考試無弊則全不反而自思應否治罪殊屬荒誕無理見因該給事中有覆考時尚恐南書房有人設法照應請旨嚴密防範因卽如其

所言先向內閣查取洪瑩等殿試各原卷加封進呈一面派滿洲軍機章京將洪瑩由福園門帶至上書房命二阿哥監看令其默寫試策朕親加披閱設字策不符顯有弊竇非但戴衡亨與洪瑩獲罪甚重凡此次派出讀卷之大學士董誥等皆當一併懲處朕豈肯稍爲寬假今洪瑩所默對與原卷悉符間有數字誤寫用硃筆點出者不過文義小有異同語句先後微有參差試思尋常擬作詩文數日後尙不能悉行記憶今距殿試已逾兩月之久而洪瑩竟能記憶默寫非積學有素安能如此尙有何弊且殿試前十卷進呈時洪瑩本係朕拔置第一並非讀卷官所擬花杰何得指稱戴衡亨一人援引之力至於黃中模黃旭各原卷文理皆可列二甲惟黃旭末四行字畫不能工整如前亦並無一行筆今黃中模列置二甲黃旭置二甲之中尙皆公允此二卷亦非由戴衡亨

首先校閱花杰何得指戴衢亨徇情顛倒如此妄行參奏伊自問
可以脫然無事乎又花杰摺內稱本年考取南書房四人除王以
銜外周系英係英和同年席煜係英和門生姚元之則係英和戴
衢亨二人門生文字雖優鑽營尤甚英和平日賞識戴衢亨畏忌
英和陰與爲附實屬結黨行奸等語本年考試南書房英和會同
戴衢亨瑚圖禮保舉十二員朕圈出與考人員選取四員內周系
英王以銜本係講官於隨圈時朕曾屢次召對加以遴選席煜姚
元之試卷本佳並非戴衢亨英和力薦若謂周系英係英和同年
則豈是科止英和一人可供文學侍從之選其餘竟無一人可用
若謂席煜等係其門生豈戴衢亨英和二人所取之士皆不可選
用內廷乎尤爲謬妄至名節所繫卽尋常一介齊民朕尙不忍令
其受人污蟻况戴衢亨任用已久經朕用至協辦大學士今花杰

任意詆訐無所不至朕豈肯任其甘受虛誣花杰著交部嚴加議處並著將洪瑩等殿試原卷及昨日默寫之卷均發交花杰閱看令其心服又諭洪瑩能默寫策問僅謄十數字的係真才實學朕命二阿哥監看封奏朕親自校對大約無弊矣洪瑩平空被誣若實係不能書寫當得何罪著賞紗二件以示獎許花杰誤聽邪言濫行入告本應嚴議恐阻言路改爲交部加等議處劉承澍播弄典常殊屬陰險著解任交大學士慶桂董誥尙書曹振鏞侍郎桂芳嚴訊確情具奏○丁卯諭前日給事中花杰參奏戴衢亨各款業經逐一詳查毫無影響該給事中亦自認冒昧本日覆據祿康奏查詢德泰錢鋪中朱姓據稱伊鋪與戴衢亨家交易數十餘年見在尙欠伊鋪內銀六百五十兩又查明興源等五處當舖查對帳簿各鋪皆係查有圻所開查有圻用銀之時均由當舖送與查

有圻家使用該當舖從無出過銀票之事是戴衛亨家自與錢鋪
易銀與查有圻何涉全係捕風捉影空談豈能科以交結行賄實
罪且戴衛亨家見在尚欠錢鋪銀兩可見花杰所奏全係虛誣不
辨自明見在將此摺給花杰閱看伊更無可置喙至戴衛亨所辦
公事卽如議覆鹽務加價伊昌阿被長蘆商人懇懇曾奏懇每引
加價三文以二文歸官一文歸商如果戴衛亨有曲庇查有圻之
心照議准行查有圻每年獲利甚厚而部臣先後兩次俱經詳悉
議駁毫不任其含混是以朕不但依議辦理並將伊昌阿降調示
懲此實共見共聞尙有何弊至議覆花杰追完商欠繳納窩價一
摺亦係議令併限嚴追詳查歸繳並無寬緩是戴衛亨於所辦部
務委無絲毫錯誤惟戴衛亨前於伊叔戴均元補放倉場侍郎時
卽據陳明戶部有交涉事件朕特令不必回避今花杰憑空指劾

以事關姻戚率意誣讎經朕洞悉情偽降旨通諭然此次亦幸戴
衡亨與議二事均屬從嚴無可指摘設遇有應行從寬辦理之事
若戴衡亨有意從嚴豈不有妨公事若準情酌辦又難不恤人言
一切轉多窒礙且倉場與戶部既多交涉自應回避以符體制戴
衡亨著以協辦大學士調補工部尙書其戶部尙書員缺卽著曹
振鏞調補○戊辰諭前因山東卽墨縣武生李泰清來京呈控伊
姪李毓昌在山陽縣查賑身死不明一案當將全案人犯提京審
訊今案情已鞫訊明確除另行按律辦理外李毓昌於上年中式
進士後朕於引見時以知縣分發江蘇卽用經該省上司委赴山
陽縣查勘水災不肯捏報戶口侵冒賑銀居心實爲清正乃山陽
令王伸漢因李毓昌不肯扶同捏飾侵賑膽敢起意與長隨包祥
串謀同李毓昌家人李祥顧祥馬連升等將李毓昌始則用信末

毒傷繼復勒斃懸挂似此慘遭奇冤實從來所未有允宜渥沛恩施以示哀慰故員李毓昌前已有旨令吉綸卽委妥員將其屍棺加槨送回交伊家屬安葬著施恩加賞知府銜卽照知府例賜卹朕昨親製憫忠詩五言排律三十韻爲李毓昌闡揚幽鬱著吉綸採取碑碣石料量定高寬丈尺奏明再將御製詩發往摹刻俾循吏清風勒諸貞珉用垂不朽並著吉綸派委登州府知府前往李毓昌墳前致祭仍俟案犯定擬後將要犯二人解往山東於李毓昌墳前正法以申公憤而慰忠魂至李泰清因檢視伊姪皮衣帶有血迹心疑身死不明卽同伊眷屬開棺驗視辨出毒害情形來京呈控俾奇冤得以昭雪殊堪嘉憫李泰清著加恩賞給武舉其應如何立祠之處應聽伊自行辦理○諭昨日傳到劉承澍與花杰面爲質對並令慶桂等嚴加究詰錄取供詞呈覽花杰曾經稽

察通倉因高添鳳案破慮及伊任內失察黑箱輒摭拾無據之詞
參劾大員冀寬處分殊失臺臣之體花杰前已有旨加等議處俟
部議上時再降諭旨至戶部員外郎劉承澍於本衙門應辦公事
不知愼密先將鹽法志借與閱看及議覆後又將原議帶付閱看
故爲漏洩其居心殊不可問劉承澍著交部嚴加議處○我陝西
漢中協副將改漁渡營爲定遠營○以常英和世泰爲內閣學士

常英由詹事知世泰由副都統遷

○己巳諭李毓昌秉公查賑不肯扶同捏報致

被王仲漢毒斃一案見經軍機大臣會同刑部詳細審明具奏按
律辦理定例地方賑務係藩司專責所有王仲漢虛報戶口冒領
賑銀楊體未經查出且李毓昌爲派往查賑之員忽報自縊又未
訪查究辦會銜率轉至胡克家兼署臬司於此等重案情節支離
自應反復推求詳爲指駁乃僅據該府縣詳稟率請具題殊非尋
常華續錄

常疏玩可比楊護胡克家均著交部嚴加議處其該管道員應得處分並著鐵保等查明具奏又諭李祥顧祥馬連升俱著凌遲處死包祥著卽處斬李祥等三犯均謀害伊主而李祥於伊主李毓昌查出王仲漢冒賑欲稟藩司之處先行密告包祥轉告王仲漢迨包祥與王仲漢謀害伊主亦先與李祥密商該犯首先應允商同顧祥馬連升一同下手是李祥一犯尤爲此案緊要渠魁著派刑部司官一員將該犯解赴山東沿途飭令地方官多派兵役防範到山東後交該撫轉飭登州府知府押至李毓昌墳前先刑夾一次再行處死仍著摘心致祭以洩憤恨包祥首先設計很毒已極著先刑夾一次再行處斬顧祥馬連升二犯著各重責四十板再行處死派刑部堂官秦瀛押赴市曹監視行刑至王仲漢一犯因李毓昌不肯隨同冒賑輒與包祥謀毒致死應卽立予斬決惟

見在尚有質對之處著暫緩行刑○諭軍機大臣等百齡等奏據黃飛鵬稟報見在朱渥幫船有數十餘隻又有夾板夷船甚屬高大共計五十餘隻於五月二十一日在洋蕪洋面分別犄角據險放礮舟師進攻之時該匪仗其船高不避礮火迎頭拒敵師船損壞二十餘隻弁兵亦多傷斃直至午後師船搶占上風奮力擊壞賊船數隻方始竄逃等語朱渥盜船前經阿林保奏稱該犯悔懼投首情詞真切經展降旨傳諭尙須加意察看不可冒昧辦理今朱渥見在南澳等處洋面率同幫匪多船顯然拒敵並將弁兵殺傷多人傷壞師船不少是其兇逆較著何嘗有愧悔之意阿林保前奏竟屬不實此時粵省官兵因勦辦張保仔等賊船有失利之事該省兵船較少碣石鎮總兵黃飛鵬一路師船已令卽行調回堵禦協勦惟黃飛鵬調回之後南澳一帶僅有胡于鉉一路舟師

兵力單弱不敷堵剿朱渥一股本係閩省賊匪阿林保不得因有前次投誠之說觀望遷延致滋貽誤著卽飛飭該省得力舟師駛往南澳一帶會同胡于鉉認真剿辦惟當殲獲務盡不可玩縱○諭王仲漢因冒賑畏懼李毓昌具稟令包祥商同李毓昌家人李祥等謀毒致死一案見經審訊得實已將包祥等按律辦理並降旨將藩司楊馥兼署臬司胡克家交部嚴議矣至昨訊據王仲漢供稱伊謀死李毓昌之後卽赴府面見王轂告知實情有求其保全不敢忘恩之語王轂前往督同相驗隨草率了結迨至臘月初間曾送過王轂銀一千兩並許隨後再行報效等語王轂以本管知府於屬員冒賑謀害委員不卽舉發查辦竟敢力爲庇護且收受王仲漢銀一千兩亂法營私通同一氣其罪甚重王轂已有旨革職除俟解到時再行嚴審定擬外應先行籍沒示儆著鐵保等

卽將王穀任所及安徽原籍資產一併嚴密查鈔無任隱匿寄頓其查賑分得銀兩之委員同知林永陞從九品溫南峰等五人前經有旨令鐵保革職送京查鈔家產除林永陞一員見已押運來京業經降旨令倉場侍郎直隸總督派員迎擊外其溫南峰等四人卽著迅速解京勿稍延緩又尙有供未得銀之縣丞章爲棟等五員前有旨令鐵保確查有無通同侵冒情弊亦須據實查明卽行具奏如所查再有遺漏經此閱審訊得實或朕另行訪詢明確則惟該督等是問至江南有如此奇案可見吏治敗壞已極該督等直同木偶尙有何顏上對朕下對民前月已降旨令鐵保汪日章自行議罪尙未見伊等覆奏著再催令卽速議罪上聞候朕降旨覈辦並著將御製憫忠詩排律三十韻鈔寄鐵保等閱看○庚午諭本年朕五旬萬壽屆時准內外王公大臣呈進膳品原以伊

等臆歡祝嘏藉聯上下之情不貴豐腴朕聞乾隆年間臣下恭備膳品至有在宮門附近廟宇廣設棚座紛紛備辦者今次亦有欲倣舊樣者曾有人面奏殊屬多事不惟過事周章且於體制不合所有本年王公大臣等屆當進膳之期著無庸各行備辦惟當將應用食品器具及所需庖人由御茶膳房率同備進俾歸畫一以符體制○王申諭朕每日召見軍機大臣伊等皆兼管部務自卽以該部應辦事件向其咨詢此外部院各大臣亦逐日更番召見無不問以各該管衙門事務伊等遇有公事自應彼此熟商卽或意見不符亦儘可兩議並上乃部院諸臣每先向軍機大臣探問方行定稟以致司員等得以從中播弄及議妥後輒稱係軍機大臣主見實屬近來惡習卽如戴衢亨議駁長蘆鹽價不許加至三文該商等積欠飭令併限完交均係從嚴定議與蘆商毫無利益

而花杰轉謂戴衢亨庇護伊戚查有圻甚至撫拾瑣屑細故逞其
筆端有心污穢並以科場大弊壞人名節試思所參屬實不獨戴
衢亨獲罪甚重凡閱卷大臣皆當得何罪卽朕亦不忍出諸口乃
花杰率行列入彈章此何等事可云得自風聞乎此而不加懲治
轉非朕開通言路諸事覈實之本意矣至劉承澍身爲部員先以
鹽法志及衙門檔案交與花杰閱看後又將部中議彙故爲洩漏
致花杰得以極力排擠其居心尤不可問本日吏部議處奏上花
杰著照議降三級調用劉承澍著照議革職至戴衢亨與各堂官
公商定議後催令在園辦彙不將司員封閉在署辦理致招物議
部議降二級調用尙覺過重著改爲降一級留任○諭江省山陽
縣查賑委員李毓昌身死不明一案見經訊明係已革知縣王仲
漢畏其持正欲行稟揭令家人包祥同李毓昌家人李祥等謀毒

致死案情明確歷歷如繪昨已將各該犯按律定罪分別辦理乃
今據鐵保奏此事尙稱毫無端倪欲再加體訪具奏是其始終憤
憤經朕降旨飭查之後仍爲人所蒙蔽而摺內尙鋪敘神鬼之詞
以爲破案來歷豈足昭示天下不知此案交軍機大臣會同刑部
審訊俱就各犯吐供先後質對並未刑求是以水落石出毫無疑
義爰書具在又何庸證以渺茫恍惚之談且李毓昌是日歸寓後
被毒身死而鐵保忽疑其在王仲漢席間中毒因而徧詢同席之
人致無影響轉將庖役拏究昏憤糊塗已極是其於案情關鍵亦
全然不知摺內空陳焦急之語猶欲再爲體訪實情豈不可笑鐵
保從前在司員及侍郎任內曾經屢獲愆尤棄瑕錄用自補放兩
江總督以後不能敬慎辦公一味偏聽人言固執己見辦河工則
河工日見做壞講吏治則吏治日見廢弛甚至有不肖劣員藐視

法紀逞其貪戾殘忍全無忌憚致釀成如此奇案而彼猶夢夢不知可謂無用廢物不但不勝封疆重任亦何堪忝列朝紳鐵保著革職發往烏魯木齊效力贖罪汪日章身為巡撫於所屬有此等鉅案全無覺察如同聾瞶尙不至如鐵保之固執謬見伊年老無能著革職回籍江南布政使楊體於查辦災務初尙認真惟於王伸漢冒領賑銀竟未能詳細查出其咎甚重應卽照部議革職姑念其平日辦事尙爲實心著留河工效力兼署按察使胡克家於此等重案並不詳細指駁反復推求草率詳請具題亦著照部議革職留河工效力以觀後效○諭前因花杰奏稱查有圻札致天津總商以積欠窩價皆可不交已與戴衢亨言明之語質之鹽商馮錦等可知交徵瑞額勒布查詢各商有無此信今據奏總商內實無馮錦其人其總商任秉衡等亦均未接此信當覆派慶桂董

誥蘇楞額桂芳根訊花杰據稱此語實由劉承澍轉告而劉承澍狡不供認不可不研究明確以憑覈辦花杰因失察黑檔出米已降三級調用復又因前日妄參不實降三級調用著解任同已革之劉承澍均交慶桂等嚴訊務得確情無任支飾○調阿林保爲兩江總督以方維甸爲閩浙總督訓成甯爲陝西巡撫以金應琦爲山西巡撫劉清爲山西布政使積朗阿爲山西按察使由甘肅夏道遷○以蔣攸銛爲江蘇巡撫調慶保爲江蘇布政使以朱錫爵爲山東布政使張彤爲山東按察使由登萊青道遷○以史積容爲江甯布政使由大理寺少卿遷○調馬慧裕爲漕運總督以陳鳳翔爲河東河道總督由直隸永定河道遷○癸酉諭據慶桂等奏將花杰劉承澍二人連夜研訊劉承澍於花杰所奏查有圻札致綱總馮錦以積欠窩價可以不完之語堅不承認而花杰仍執定係劉承澍所言請再加根

訊等語此事花杰劉承澍二人面言之時並無旁人在側無可質證今彼此狡卸非劉承澍有心抵賴卽係花杰聽聞不確率意書寫若再加熬訊亦不難水落石出惟究係口舌細故亦不值加以刑鞫花杰已因失察黑檔降三級調用又因參款虛誣降三級調用著卽釋回照例在部候選劉承澍業因此案革職著卽飭令回籍○甲戌諭溫承惠奏查明康家溝張家灣及通惠河等處河道情形一摺康家溝一帶本非運河正道前因該處衝刷成河張家灣日形淺阻若欲堵築康家溝以復正河又無築壩生根之處是以暫緩未辦卽令糧船在康家溝試行一二年再爲定議今據溫承惠奏康家溝溜勢奔騰漕船逆流而上大費牽輓該處地勢甚高恐旱乾之歲河水一瀉無餘漕行更爲棘手是康家溝必須堵築正河必須修復惟兩岸均係沙灘壩基難立而正河積淤日甚

挑挖費工辦理亦屬不易此事關係漕務甚重著專派戴均元親加查勘詳細斟酌究竟應否修復故道如漕船必須由張家灣行走卽將應如何辦理需帑若干應於何時興工何時可以完竣之處通盤籌畫妥議具奏其該督所奏通惠河積淤年久應行一律挑復並該處緣道閘壩等項應行修整之處亦著戴均元一併查勘妥議辦理○乙亥諭本年朕五旬萬壽不准辦理慶典該廢員等無庸令其建設經壇致滋粉飾伊等旣情殷祝嘏著准令其在禮部陸續報名卽交禮部鴻臚寺會議酌定處所示令伊等於萬壽正日另班行禮至回鑾時接駕獻冊之處亦著准行○諭據汪日章奏上年江省查辦賑務各州縣戶口銀數必將上兩屆被災情形與此次參考不至懸殊方准放給惟山陽縣較之十一年僅多十二鄉而需銀至九萬九千有餘曾經駁查並另委隨帶之員

密查始行覈准動放等語山陽賑務見據王仲漢供認侵冒銀六千餘兩伊曾致送本府王轅銀二千兩各委員銀一千六百餘兩以王仲漢之貪殘忍戾而該員賑銀九萬九千餘兩之中侵冒入己之銀僅止二千餘兩尙恐不實不盡王轅得受王仲漢之銀自亦不止二千兩著留京王大臣會同刑部再加嚴訊務得實情○諭本日慶桂等奏議駁御史周鉞酌易辦賑章程一摺已依議行矣各省水旱偏災事所常有朕病瘵在抱念切民艱一經該督撫奏報到時披覽奏章惻然心目無不立降諭旨令其認真撫恤卽需數百萬帑金從無絲毫靳惜亟命部臣立爲籌撥惟恐後時誠以小民蕩析離居情形最堪憐憫若不設法拯救將何所依國家辦賑章程良法具在如果各州縣實心經理該督撫認真查察自能實惠及民無如地方不肖之員昧良喪心視同利藪而派往查

賑之委員等賢不肖亦復迴殊閒或有持正之人而嗜利者多轉深憎惡如近日寶坻山陽兩案該革令單幅昌王伸漢皆飢法營私侵肥入己而委員中如李毓昌之持正不阿者更復有幾擠窮黎於溝壑圖自贍其身家卒不能倖逃憲網朕代天子民惠鮮懷保斷不肯因此兩案接踵破露慮貪官之牟利致屯百姓之恩膏受污吏之欺蒙忍奪良民之口食此後設遇被災之區仍當頒帑發粟救其阻飢如前一律辦理惟辦理之得有實濟與否是在督撫如該督撫不知認真經理徒以爲立法未周如御史周鉞所言欲於地方官查明戶口之後另委道府承辦試思道府中又豈盡屬賢能見在寶坻一案該管東路同知歸恩燕卽曾需索銀三千兩山陽一案該管知府王穀亦曾收受銀二千兩設遇此等道府令其領放賑銀又豈可信又況該府道等於各州縣村莊戶口不

能親歷周查勢必仍行轉派委員分投前往委員之查賑愈繁州縣之費用更廣於賑務無益而有損如督撫等果能一遇災賑先行嚴查覈實而於派往查抽之委員務擇存心公正之人責成查察仍隨時密加廉訪賢者立加獎拔不肖者卽予糾參則弊竇漸除亦無慮小民之不霑實惠儻督撫等見見在寶坻山陽二案破露以爲賑務剔弊綦難自揣耳目不能周徧惟恐地方劣員侵冒肥己累及上官相率諱災不報如此則玩視民瘼勢必致窮黎無可赴愬而朕惠養元元之澤不能下逮其獲戾尤重一經查出朕不能稍爲寬恕也將此通諭知之○丙子 上啓鑾秋獮木蘭○免經過地方額賦十分之三○己卯諭御史陳中孚奏請嚴定大吏濫行薦舉處分以專責成一摺據稱侵蝕賑銀之革員單幅昌謀弄職官之革員王仲漢及已革知府王穀皆由捐納佐雜出身

遞遞薦拔該員等不識詩書罔知大義不過以腹削民膏鑽營上官爲事茲惡劣俱已敗露請嗣後將濫行保薦此等捐納佐雜出身人員之該管各上司照尋常濫保例加倍嚴議等語所奏未免過當國家登進用人原不能竟拘資格各省州縣中由捐納出身者固有不肖之徒卽正途出身各員其簠簋不飭逢迎大吏者亦不能保其必無全在該管各上司平日留心訪察秉公覈實必係循聲確著之員方予保薦庶可遞拔真才若將貴綠鑽刺之劣員濫邀薦舉一經發覺該上司處分定例綦嚴卽如王穀王伸漢單幅昌等之殘忍貪婪見俱已審明定讞其該管各上司重者已革職遣戍輕者亦降黜示懲並未稍從寬假若因此追溯從前濫保之各上司查明加倍嚴議則未免過甚嗣後各督撫於薦舉各員惟當倍加慎重以保薦王伸漢等劣員爲戒庶再有似此濫保致

于憲典者必將該上司從重懲治亦不在多設科條也○庚辰諭
王伸漢之子四人本應全行遣戍姑念年皆幼穉無知著將伊長
子恩觀收禁俟及歲時發往烏魯木齊其餘三人加恩釋回以示
法外施仁之意○壬午 上駐蹕避暑山莊○癸未以雨詔停秋
獮○頒發書籍於盛京各學○以南河河工穩固復與取二品頂
帶○戊子諭戴均元奏查看張家灣康家溝河道情形及通惠河
先宜挑淤培築一招張家灣舊河應行挑復固屬正論但見據戴
均元親自測量張家灣河頭不但愈淤愈厚壩基難立計需土方
工料銀兩爲費不貲而見在時日已迫卽加緊釐辦亦非五六箇
月不能竣工轉瞬漕運已來河道未復船行轉致有礙是目前勢
不能辦亦止可仍在康家溝行走再爲察看一年屆時酌量定奪
至通惠河爲漕白糧及銅鉛轉運要路旣據戴均元奏見在河底

日淤隄岸卑薄恐明春新漕到壩水勢消耗難行自須趕緊先辦著照所請將河身應行間段挑挖以及隄工緯道有須分別修整之處卽於本年全漕運竣之後奏明派員勘估興修勿再遲緩其應行賠修之工著卽飭承辦之員勒限賠補

八月己丑朔以故哈薩克汗博羅特子托霍瑪襲爵○壬辰論軍機大臣等百齡等奏盜幫連日竄入中路海口派撥兵船堵剿業經追出外洋一摺從前賊船在外洋游奕皆恃有打單接濟之資足以度日謀生是以罕入內河自百齡到彼諸事整飭嚴斷接濟該匪等口食無藉其鋌而走險分撥小船向內河各村莊希圖劫掠勢所必至見經百齡等飛調陸路官兵添雇壯勇馳往攻捕殲擒二百九十餘名賊匪陸續竄出濱臨外洋之潭洲一帶聚泊民情均已甯謐至百齡等以未能先事豫防致賊匪竄擾內河自請

議處一節此可不必該省武備廢弛已久今百齡等認真整頓且已將盜船轟出外洋尙非辦理不善惟求治未免過急耳爲今之計總須先固藩籬將防堵要策力爲講求嚴密布置使賊匪不敢窺伺趕緊添造米艇豫備礮械軍火俟諸事齊備養成蓄銳再行調派官兵駛放山洋自不難一鼓殲除俾無遺類儻不量力冒昧輕進賊船多而師船少未免心生顧怯設有疏虞賊勢更覺鴟張辦理倍形棘手至中路附近省垣尤爲緊要如各隘口水路兵船有可撤者著百齡等酌量抽撥嚴防中路毋令賊匪竄近此次百齡等派雇壯勇數百名隨同官兵堵剿爲一時權宜之計則可究非長策莫若於近海各處村莊勸諭鄉民各衛身家自行團練賊來既可抵禦賊去仍安本業較之招募實無流弊但必須官爲經理始不至漫無統率著百齡等遴選明幹之員督率妥辦切勿藉

端滋擾爲要其漢軍水師三百名此時既無所用自應撤回歸伍
見在盜首張保仔等由潭洲分向蕉門等處外洋逃逸百齡等飛
調黃飛鵬舟師及所雇拖風船隻交孫全謀督同勦辦務須斟酌
前進計出萬全以期擒獲巨惡無得過於輕率○乙巳諭吉綸奏
查明故員李毓昌服姪李希佐承繼爲嗣一摺李毓昌前此委查
山陽賑務居心公正立品端方慘遭毒斃情殊可憫除已疊加恩
卹外其繼子李希佐並著加恩賞給舉人准其一體會試繼紹書
香以示獎忠至意○丙午金應琦以疾乞假以初彭齡署山西巡
撫部關○庚戌諭前因御史陸言參奏浙江學政劉鳳誥於上年
代辦監臨各劣款當經派托津等馳往查辦茲據究出上年鄉試
劉鳳誥代辦監臨時有江西同鄉鹽庫大使嚴廷燮來見關說仁
和縣廩生徐步鰲曾經劉鳳誥歲試拔取前列伊見因病軀恐不

能完場若得沈晉與之聯號誼屬師生即可照應中後還要報恩
劉鳳誥入場違例於三場試卷印用聯號見據供認屬實將劉鳳
誥等定擬具奏披覽之餘殊深駭異劉鳳誥學問尙優仰蒙 皇
考高宗純皇帝特加賞拔迨朕親政後由學士用至侍郎又因恭
修 皇考實錄錫以宮銜屢昇衡文之任疊荷恩施極爲優渥當
如何潔己奉公勉圖報效乃伊竟敢於科場大典有心舞弊試思
監臨大員原藉以彈壓糾察今轉聽受人情印用聯號若徐步整
萬一微倖自思當得何罪昧良孤恩莫此爲甚托津等以劉鳳誥
未經得受財物無贓可計照例擬流請發伊犁尙覺稍輕劉鳳誥
著革職拏問伊見經解部著到京時交刑部嚴審再行定擬其餘
所議罪名先著刑部覆議具奏至阮元近在同城豈無聞見朕於
御史陸言未奏之前卽有所聞曾降硃諭交查而阮元覆奏不過

撫拾浮詞全無確據阮元身任封圻於學政有稽覈之職外閒既有木榜聯詞伊卽應究查參奏况經朕特加詢問猶不據實入告今劉鳳誥事已敗露始據稱上年閏後卽間有監臨打監軍對聯是竟知而不言有心袒庇同年不顧公議深負委任豈堪復膺封疆重寄阮元著交部嚴加議處來京聽候部議其餘應行議處各員著吏部議奏○調周兆基爲吏部右侍郎轉朱理爲刑部左侍郎以初彭齡爲刑部右侍郎署山西巡撫○調蔣攸銑爲浙江巡撫章煦爲江蘇巡撫以同興爲雲南巡撫素納爲安徽布政使福昂爲直隸按察使由陝西道遷○以方積爲四川布政使常發祥爲四川按察使由陝西道遷○甲寅 上自避暑山莊回鑾○諭百齡奏遵旨查明吳熊光任內未經奏明辦結之盜案二十二起見在嚴催提省督同臬司訊辦並分晰開單呈覽一摺各屬報獲盜案係總督

臬司專辦之事果能隨時上緊催提審明具奏何至延閣經年案懸未結且據稱先後具報監斃之犯共有十二名其中法無可貸者倖逃顯戮情有可原者轉痰斃固圉是吳熊光與歷任臬司相率因循實均有應得之咎吳熊光前已另案褫職遣戍前署臬司蔡共武業經病故及兼署臬司之藩司衡齡任內未結盜案僅止一名俱無庸議外所有查明任內未結案犯四十名之降調臬司吳俊著交部嚴加議處任內未結案犯二十名之候補道員署臬司楊煒著交部議處○乙卯諭軍機大臣等前據百齡奏到越南國王阮福映表奏見將南掌國王召溫猛並乾隆六十年頒給該國王敕印送至諒山關一摺當經降旨諭將敕印速行送京仍著越南國王將召溫猛等暫留該國候旨並令軍機大臣詳查檔案南掌國自乾隆六十年至嘉慶十年召溫猛所進蒲葉表文向不

鈐蓋印信復降旨令雲貴總督伯麟將該國咨呈督撫印文查明印信以便與禮部印模覈對茲據伯麟奏南掌國是否被召蛇榮占據僞託召溫猛進貢抑係召溫猛潛赴越南阮福映處冀得印信之處於沿途各土司與南掌接壤地方詳細查訪得有確情再行馳奏並將六十年該國王召溫猛咨呈督撫用印公文二件呈覽等語召溫猛於乾隆六十年錫封後年雅無援既經播遷在外十有餘載則嘉慶五年十年兩次遣使進貢究屬何人僞託昨越南國王表文內開見在召溫猛是其身自不難向其根究著百齡知照越南國王將召溫猛等送至關外卽派明幹大員出關面詢召溫猛於何年接奉敕印何年出奔何以未能歸國伊國中何人占據令其逐一登答俟奏到時再降諭旨○丁巳諭朕體恤民艱痼瘼在抱地方偶遇水旱偏災發帑拯濟從不絲毫靳惜原欲

使顛沛窮黎咸登衽席在職司民牧者卽照定例分別極貧次貧戶口實心撫恤猶恐僻壤窮鄉未能周歷巡察致有遺漏乃不肖州縣非惟不認真經理且竟從中侵蝕私肥囊橐官吏多一分侵蝕窮黎卽多幾許餓殍是直向垂斃飢民奪其口食豈復尙有人心行爲竟同盜賊向來疆吏因辦賑地方國帑攸關未嘗不特派多員會同查辦俾互相稽覈以杜弊端而委員中存心公正者甚難其人扶同一氣者正復不少欲杜弊而轉多舞弊之人欲節用而更增分銀之吏見在留京王大臣會同刑部審擬山陽冒賑一案訊據王仲漢冒賑銀二萬三千餘兩其入己銀數至一萬三千餘兩之多已屬法無可貸且因此謀毒李毓昌斃命貪黷殘忍莫此爲甚王仲漢著卽處斬王穀身任方面於屬員冒賑謀命重情一經覺察卽應據實揭參乃因王仲漢向其懇求保全轉代爲容

隱於相驗李毓昌屍身時任聽作捏報不過掩人耳目且事後又復得銀二千兩知情受賄同惡相濟正不必計其贓數而罪已無可逗留京王大臣等擬以斬候請入於本年朝審情實辦理屆期亦斷難寬宥又何必稽延時日但竟予以斬決與王伸漢又無區別王較著改爲絞立決派刑部侍郎秦瀛監視行刑於九月初四日覆旨所有查賑委員雖訊無事前商同情節而所分銀兩豈有不知係王伸漢冒賑所得且此內林永陞係總查之員又得銀一千兩爲數獨多擬以杖流尙覺過輕林永陞著改發烏魯木齊效力贖罪其餘各委員罪名俱著照擬分別杖流從前李毓昌秉公確查不肯浮開且欲將王伸漢侵冒情事稟揭以致受其謀害昨已屢降恩旨用慰忠魂今查明委員內有教諭章家麟同時查辦不特未經得銀亦且覈對所開戶口毫無浮冒於公事尙爲認

眞自應量予恩施章家麟著送部引見以知縣即用

九月己未諭軍機大臣等阮元奏舟師勦捕蔡逆得有勝仗該逆向南竄逸見在飛咨緊追一摺據稱接據提督邱良功函稱偵知蔡逆在旗頭一帶游奕折截前進童鎮陞追見盜船卽向前揮令各船進勦署守備武定大首先躍過帶同弁兵拏獲盜匪王鳥等五十一名該匪船卽竄往東南外洋見已飛咨邱良功等緊蹙勦捕等語蔡逆匪船奔竄靡常蹤迹向無一定此次追勦之匪船究有若干蔡逆是否在內見既據拏獲盜匪王鳥等五十一名卽可確切訊究得其實據著傳諭蔣攸銛卽將所獲盜匪王鳥等嚴行審訊一面飛咨該提鎮專注蔡逆乘勝進勦一經殲擒卽遵前降諭旨速行馳奏○庚申 上還京師○壬戌諭劉鳳誥於代辦監臨時入場舞弊一案前已降旨將伊革職拏問解京矣監臨入場

專司查察弊竇如果士子有串通吏胥聯號等弊方當按律嚴懲以肅場規今劉鳳誥聽受人情轉爲應試生員徐步鑒印用聯號是防弊之人首先作弊實屬事所罕見伊蒙 皇考高宗純皇帝賞拔深恩由編修超擢學士朕復加恩游擢侍郎並特加宮保銜乃不知謹慎飭躬力圖報效竟敢玩法舞弊其罪甚重托津等於按律擬流之外請發伊犁所擬尙輕劉鳳誥俟擊解到京時著交大學士尙書會同刑部再行審訊定擬具奏至阮元亦由編修於乾隆年間蒙 皇考高宗純皇帝知遇厚恩超列卿貳朕親政後復擢用巡撫畀以封疆重任前後十年渥荷恩施上年伊因巡查海口不能兼辦科場所有監臨事宜卽應照例奏交藩司代辦伊甯不知鄉試士子係由學政錄送入闈劉鳳誥本當避嫌何以輒將監臨之事交伊代辦此一節阮元已屬非是至伊與劉鳳誥本

屬同年如果劉鳳誥在場舞弊阮元實在不知則其咎原不過失察卽或伊知而不肯舉發一經朕詢問及之尙能直陳無隱是雖有瞻徇之情尙不至蹈欺飾重咎乃朕於御史未經參奏之前先有所聞卽特降殊筆諭旨向其密加詢問而阮元覆奏之摺亦係親自繕寫乃並無一語確實轉稱劉鳳誥代辦監臨時場規從嚴一切風厲致招深怨竟似伊於劉鳳誥之作弊妄爲實在毫無聞見者迨托津等到彼審實之後復向阮元詢及阮元始稱去年聞後卽聞有監臨打監軍對聯未經奏聞等語是直佯爲不知有心徇隱不但不參奏於先而於降旨密詢之時猶欲撓拾浮詞巧爲搪塞明係袒庇同年阮元止知友誼罔顧君恩輕重倒置不可不嚴行懲處卽著照部議革職其充當提調監試於監臨舞弊不能覺察舉發之道員舒慶雲知府任澤和均照部議降二級調用不

准抵銷○癸亥以何銑爲江西按察使

由陝西陝安道遷

○丁卯刑部奏

浙江鄉試舞弊之徐步鑒等先行分別定擬一摺得旨此案劉鳳詰身爲監臨聯號舞弊雖訊無受賄得贓情事但嚴廷變爲徐步鑒關說時曾有事後報恩之語如果微倖中式自必盡情酬謝則劉鳳詰等獲罪尤重此案總由徐步鑒起意舞弊嚴廷變玩法請託所致該部將伊二人議以近邊充軍尙不足以示儆徐步鑒嚴廷變均著改發邊遠充軍餘依議○己巳諭張鵬展奏民風士習吏治相爲表裏其要在首正人心並請令翰林科道日進經義奏議一摺所奏固係經生家言惟意欲務實而轉無實際又據所引董仲舒之語正朝廷以正百官正百官以正萬民是欲厚風俗飭官方端自上始朕每日恭閱先朝實錄誠以列聖修齊治平之道無不備載典型儀式夙夜寅承卽萬幾之暇披覽者亦皆經

史諸書鑒觀得失以期有裨治化近日御製尙書五十八篇詩章
用闡帝王危微精一之奧古來心法治法孰有過於此者若使翰
林科道日進講義其所撰述不過摭拾陳言敷衍入告無論二典
三謨莫能窺其涯涘卽賈董諸儒論說亦萬不能跂及設敷奏可
觀而能言者又未必能行况所敷陳又未必盡出己手若就此獎
其學識加以甄拔恐亦未能遽得真才行之日久又生弊端仍復
視爲具文於事毫無裨益又豈務實之道乎總之一切政務要在
實心經理賞罰勸懲悉衷至當非僅語言文字所能訓化卽如本
年王仲漢冒賑謀毒一案於吏治人心大有關係卽行徹底根究
據實嚴懲俾天下臣民共知儆惕至於士習文風屢經飭諭崇實
黜華以明經爲務以敦行爲本有衡文課士之責者果能懷遵勿
懈整飭有方自可漸次轉移蒸蒸日上不料又有劉鳳誥之案朕

深愧不知人耳其各省民風尤在封疆大吏督率地方官隨時隨事旌善癉惡去僞還淳庶無負朕端本善則至意若惟朕日矢敬勤而內外臣工不能實力奉行即使翰詹科道日進經義連篇累牘究屬紙上空談亦豈能遂臻上理乎張鵬展所言近於迂拘於政體未能通達特將朕敦崇實政不尙虛文之處通諭知之○諭張師誠等奏殲除海洋積年首逆蔡牽將逆船二百餘隻全數擊沈落海並生擒助惡各夥黨一摺覽奏欣慰之至洋盜蔡牽一犯原係閩省平民在洋面肆逆十有餘年往來閩浙粵三省擾害商旅抗拒官兵甚至謀占臺灣率眾攻城僞稱王號不特商民受其荼毒官兵多被傷亡並戕及提鎮大員實屬罪大惡極該逆一日不除海洋一日不靖節經降旨諭令該督等嚴禁接濟鼓勵舟師速擒巨憝茲據張師誠奏稱王得祿接到咨會南洋尙有蔡牽匪

船王得祿卽與邱良功連船南下於十七日黎明駛至魚山外洋見蔡牽匪船十餘隻在彼超駛當卽督催閩浙兩省舟師專注蔡逆本船併力攻擊該逆復敢用大礮扎住邱良功之船拌命抗拒邱良功被賊槍截傷其時王得祿緊攏盜船奮擊該匪因不得鉛丸接濟用番銀作爲礮子點放王得祿身被礮傷仍喝令千總吳興邦等連拋火斗火礮燒壞逆船艍邊尾樓王得祿復用本身坐船將該逆船後艍衝斷該逆同伊妻並船內夥眾登時落海沈沒提訊撈獲匪犯十九名並難民六名均供稱蔡逆手足俱被火藥燒傷落海淹斃是蔡逆受傷落海已據所獲賊夥難民供指確鑿毫無疑義王得祿邱良功協力奮追殲除首惡均屬可嘉而王得祿額角手腕各受重傷仍復奮不顧身趕攏賊船追剿致該逆登時落海厥功尤偉王得祿著加恩晉封子爵並賞給雙眼花翎邱

良功左骸受傷本船被賊舫撞壞不能前進勞績稍遜邱良功著
加恩晉封男爵至該逆用番銀作爲礮子可見鉛丸已屬罄盡總
由阿林保張師誠年來於各海口巡防嚴密使一切火藥米石槩
行杜絕不得稍有透漏該逆乃日益窮蹙立行殲滅辦理實屬認
眞總督阿林保巡撫張師誠均著交部從優議敘以示嘉獎至數
年以來修鑄船隻礮械籌備口糧並防守口岸杜絕接濟之大小
文武各員弁著交新任總督方維甸會同張師誠秉公確查分別
具奏候朕施恩其蔡牽義子小仁與逆夥矮牛並著嚴拏務獲以
淨根株將此通諭中外知之○壬申諭百齡奏粵省鹽船請酌改
陸運並查明程途運費均無窒礙各商民亦俱踴躍樂從請先行
試辦一招粵東引鹽其在省河酌運者向由外海運至省河候配
本無不便近年以來洋氛未靖凡運鹽之紅單船隻涉歷外洋其

中不肖船戶或竟私帶水米濟匪獲利見在各海口正當嚴密巡防之際則鹽船出海自應通盤算計酌定章程茲既據該督查明各場引鹽改由陸路輸運一切腳費程途尙無窒礙商民均踊躍樂從而沿海窮民亦得以營趁挑鹽藉資生計著卽照所請行如試辦一二年陸運不至稽遲商民均屬便利竟可永遠遵行○丁丑以五旬萬壽加恩內外一二品文武大臣凡降革留任處分在五案以內者開復一案十案以內者開復兩案過此按數遞加晉封尙書明亮三等伯賞還尙書鄂炳泰總督溫承惠松筠百齡一品頂帶漕運總督馬慧裕布政使方受疇二品頂帶將軍晉昌雙眼花翎○戊寅改陝西秦州營歸固原提督轄鞏昌營歸河州營轄○辛巳諭祿康等奏據山東濟南府國子監學政銜姚萬清等聯名呈請捐輸銀兩代原任濟南府知府張鵬昇贖罪一摺張

鵬昇前於濟南府任內請動公項供應廣興旋即歸款前經審明定讞革職遣戍實屬罪所應得該府紳士以張鵬昇在任時惠政甚多且母老無子情願捐銀代贖呈明該省巡撫未經批准所辦甚是茲復來京起步軍統領衙門呈懇代奏此事不可行前次安徽懷遠等縣士民曾有代參令沙琛籲懇繳銀贖罪之案沙琛獲罪之由止係因署霍邱縣任內承審重案不實尙屬公罪且知縣職分較小尙可免其納贖予以恩施張鵬昇以方面大員於濟南府任內請動公項供應廣興其罪屬私非沙琛可比見在遣戍吉林將來效力數年或可釋回亦當恩出自上若據該紳士等懇請代爲贖罪是地方大員獲戾者皆得因士民籲請納錢免罪此風斷不可開所有姚萬清等呈懇之處著不准行卽飭令回籍○諭軍機大臣等初彭齡密奏一招劉清平日居官操守尙好而才具

不甚開展朕早有所聞是以此次未令護理撫篆但既不能勝任
藩司若調至他省亦係錢糧重寄又豈能辦理裕如且伊並無貽
誤之處亦未便遽然撤退今初彭齡竟請將素納更補亦於政體
未協至所稱成甯前在山西巡撫任內聲名平常縱容家人在外
滋事一節自應徹底根究得有確據方能覈辦本日因初彭齡所
奏山西省近年來竟有十餘州縣倉庫不能全完之語成甯見已
到京當卽召見詢以該處倉庫情形據稱各州縣俱係年清年款
並無虧短此言卽近於捏飾未可憑信著初彭齡密加查訪將成
甯在彼如何聲名平常縱容家人在外滋事實據並倉庫係何州
縣虧短據實由驛馳奏其時再將藩司更換亦不爲遲將此密諭
知之○賞孫玉庭阮元編修○壬午賞已革總督長齡藍翎侍衛
爲科布多參贊大臣○癸未諭軍機大臣等綏武布奏俄羅斯固

畢爾納托爾遣使齎書請於明年冬令冰凍時在哈克圖地方來會講辦一切事宜一摺前俄羅斯汗懇請遣使進貢曾經庫倫辦事大臣蘊端多爾濟因來使不行叩拜竟行斥回稍覺嚴厲是以來使卽行回去今固畢爾納托爾復行差人齎書懇請和會看來此次俄羅斯汗或係尙欲遣使進貢著傳諭綢武布告知伊等此事已奏知大皇帝施恩准其來會卽發給咨文但明年來會時若提及仍照前次遣使進貢亦不必過於拘泥斥駁若其懇請之詞恭順卽可據實陳奏准其所請諒俄羅斯人等來京斷無膽敢不行叩拜之理屆時若與來使同來之人過多量加裁減尙屬可行除寄諭蘊端多爾濟外一併傳諭綢武布知之○丙戌諭前會降旨將各省軍流以下人犯加恩分別減等用昭矜宥因思永遠枷號及新疆遇赦不赦各犯刑部以例不查辦未經奏請但本年朕

五旬慶辰閩澤覃敷此項人犯自應一體查辦著刑部查明起數
摘敘案由開單請旨候朕定奪

冬十月辛卯越南國王阮福映表賀 萬壽貢方物○癸巳 上

以五旬萬壽 御太和殿受賀禮成 御寧壽宮賜 皇子及王

以下文武大臣蒙古王公外藩使臣等食 御乾清宮賜 皇后

及 皇子等宴○丙申 上御正大光明殿賜 皇子及王以下

文武大臣蒙古王公外藩使臣等宴並賞賚有差○戊戌諭軍機

大臣等初彭齡奏山西省虧空一摺山西州縣倉庫從前已彌補

完全地方官徵解錢糧從無挂欠何以近年來流弊復滋又有虧

缺卽如平魯一縣見據初彭齡奏降調知縣王敏樹虧欠採買穀

價五千餘兩交代已逾定限尙不完交並據初彭齡訪問係因成

甯閱邊時經過平魯左雲等縣所用車馬稍多是以王敏樹及降

調左雲縣孫燿藉口辦差賠累等語本省巡撫閱邊往來係屬常有之事何至供億繁多地方官那用公項虧缺至五千餘兩其情節是否屬實見已明降諭旨將該二員革職嚴訊著初彭齡向其根究此項辦差銀兩是否於備辦車馬之外另行餽送成甯抑係成甯家人向其需索該革員等有無別項那用借此開銷情事平陽潞安等屬見在均有虧短看來通省虧缺尙多未必止十餘州縣初彭齡見已分別確查著於查明後據實奏聞候朕辦理○壬寅蔡廷衡緣事革職以陳祁爲甘肅布政使陳桂生爲甘肅按察使由湖北制○甲辰發劉鳳詒黑龍江效力○諭初彭齡奏審辦臨晉縣假裝銀鞘大槩情形一摺此案經金應琦在藩司任內當堂劈兌遂致敗露當卽詳明巡撫成甯成甯照詳批交查辦旋卽調任陝西金應琦接巡撫印後卽將藩司印篆交劉清接受迨初

彭齡到晉署理撫篆於金應琦移交見辦緊要事件內查出此案面詢劉清據稱如要參奏可否將錢文鳳塊情節刪去否則恐奉嚴旨便難辦理等語此等假裝餉輸之案非尋常案情可比既經破露該藩司爲錢糧總匯卽應徹底根究方爲正辦乃竟向初彭齡稟請刪減情節意在袒護屬員計圖消弭卽此一語已難勝任且才具本屬平庸劉清著交部嚴加議處卽來京聽候部議布政司庫大使郭文照並著解任交初彭齡歸案質訊至金應琦見在患病未痊所有巡撫印務仍著初彭齡署理尋議上得旨劉清照議降四級以從四品京堂補用○諭軍機大臣等初彭齡奏審辦臨晉縣假裝銀鞘一案摺內稱金應琦本月初四日到貢院往拜口至胥廂行動尙須扶掖忽於初七日午後差人持送病愈銷假奏稟閱看等語金應琦病旣未能全愈急於銷假接印自因初彭

齡到彼諸事認真不肯蒙庇伊是以勉強支持意在接受印篆後
初彭齡即可交代起程回京伊於地方事件遂得任意彌縫著初
彭齡傳諭金應琦令其安心靜養不必急於任事俟病體脫然再
行奏請接篆其平日官聲辦事如何著初彭齡密爲訪查具奏若
一味瞻徇情面不顧公事亦難勝封疆重寄其王敘樹孫燿藉口
成甯閱邊辦差賠累一案務遵節降諭旨徹底根究有無餽送成
甯及伊家人需索情事是否該革員藉端開銷據實嚴參至承辦
臺工未及成分之革職停選知縣王殿襄等所領銀兩是否有侵
那情弊並著嚴究所有五臺工程究竟見有若干成數初彭齡於
審案完竣赴彼查勘明確另行奏聞○調素納爲山西布政使以
李奕駟爲安徽布政使廣泰爲安徽按察使由廬鳳道遷○丁未賜汪
道誠等五十七人武進士及第出身有差○庚戌諭山西藩司劉

清奏才不勝任懇請開缺一摺此奏爲從來所罕見藩司爲錢糧總匯劉清如自揣才庸不能勝任卽應於簡放時具摺懇辭何以接篆已逾兩月始以限於才識奏請開缺自係因初彭齡到彼諸事認真查辦難以枝梧故爲此奏前此臨晉縣假裝鞘銀一案該藩司遽向初彭齡稟請刪減情節意圖消弭已難勝藩司之任當卽交部嚴議應降四級特降旨加恩以從四品京堂補用茲復有此冒昧陳奏之摺看來該藩司人本無能並難勝小京堂之任劉清著以員外卽補用○阿林保等議津貼州縣兌糧費請有漕州縣每石八折收納上以病民嚴飭之

十一月丁巳朔諭軍機大臣等吳璥等奏籌催回空渡黃並狀元墩場工暫緩堵合情形覽奏俱悉惟所奏查辦海口一事意欲不挑復舊河仍就北潮河去路展寬挑深將灘面攔束以爲權宜治

標之策所奏殊不可解謬誤之至海口去路不暢以致上游淤阻河身逐漸擡高非將舊河挑挖深通斷然無益北潮河一帶溜走兩年至今不能刷成河槽佃湖又經淤墊明年更無容納之地及今不挑復舊河將來何所措手此卽向來不諳河務之人亦能明悉大局况吳璥等久諳河工非情於籌辦者可比吳璥上年差往南河曾主挑復舊河之說卽近日陳奏各摺亦以新改之河不能通暢此時正當籌辦喫緊之際何容稍有憚難乃本日摺內奏稱估計挑河有一百餘里之長漫口寬四五百丈又加接築長隄其費需三百六七十萬未免過繁兼恐挑汛前趕辦不及因請於見在歸潮河之路權宜辦理以期節省錢糧等語舊海口挑河築隄堵築各處漫口工段誠繁然每年辦工之時總不過霜降至桃汛以前止此數月今年既趕辦不及明年又將如何趕辦若云錢糧

浩繁專爲惜費起見尤屬見小錢糧用度但論其於國計民生是
否有益如果有益卽多至數百萬亦所應用若於事無益卽所費
稍省又豈可虛擲今吳璥但顧錢糧節省而不期於事有益待至
明年北潮河之路仍不通暢而舊海口又未挑深河水拍岸盈隄
下壅上漬不知該河督等有何把握恃以無虞彼時此五十萬兩
已成虛耗而估挑舊河之三百數十萬兩仍不能省徒然坐失事
機更增後慮下游民田廬舍以及百萬生靈所關非細一有貽誤
卽將該河督等正法亦復何益於事而糜帑一節猶其小焉者矣
吳璥等於此重大要務不能堅持定見欲如此遷就辦理大屬非
是著傳旨嚴行申飭前已於十月二十三日降旨令該河督等卽
速親往舊海口履勘籌議辦理章程此時不得再有遲疑著卽迅
速詳查確實覈估將應行撥帑興工之處據實奏聞及時興辦至

吳璥本主挑復舊海口之說何以目前忽爲此奏如果另有爲難
窒礙之處亦著詳悉陳奏不得一味含糊諉卸也○戊午諭軍機
大臣等吳璥等會議漕務章程一摺江南漕賦較他省爲最多而
歷年告漕者不一而足是皆由於地方官於收漕時弊端叢生以
致刁生劣監挾制把持告訐成風此時欲大加清釐必須探本清
源方爲正辦據摺內稱旗丁應領行月贈五等米見聞蘇松所屬
有每船折米一百石之說旗丁折銀花費長途將正漕侵食盜賣
勢所必至等語此固腐缺之一端而其弊不止於此著照吳璥等
所議飭令槩兌本色另貯一艚免致影射蒙混見當收漕之時旗
丁行月贈五等米如尙有每船折米一百石之事卽當查拿嚴辦
至向來旗丁等沿途浮費前經馬履泰條奏已通行飭禁並著阿
林保章煦曉諭旗丁以爾等從前因各衙門需索陋規多有浮費

以致長途賠累自不得不於兌運之時向州縣勒索幫規州縣勢不得不於開徵之日向百姓浮收今自總漕撫藩糧道倉場各衙門以及沿途文武各員並書吏經紀等處向來陋規欽奉諭旨嚴禁儻有不遵仍照舊需索准爾等指名首告且該州縣等本有津貼各幫銀兩原爲輓運正供而設非爲爾等酬應之資其提溜打關剝淺等事比從前不無多用見已令該省督撫量加調劑是爾等浮費既除運費又足儻有仍前藉口橫索幫規必當查拏究辦如此剴切曉諭旗丁並出示沿途經過地方俾各知懷遵則旗丁不至賠累橫索兌費州縣亦不能藉此浮收而包漕漁利之徒亦不能從中阻擾滋事庶漕弊可漸次清釐該督撫務宜實力奉行隨時查察毋得日久生懈○庚申諭初彭齡奏審擬降調平魯縣知縣王斂樹等藉口辦差賠累那用公項一摺成甯前在山西巡

撫任內赴省北閱兵何以該縣備辦公館鋪墊等項竟至用錢二百三十餘千且需用騎馬七十九匹馱廐二十頭大車七輛之多又家人錢四需索門包銀五十兩種種均干例禁著成甯明白回奏其應得何罪之處並著自行具奏前任藩司金應珩於王敏樹孫燿二員虧空數目既已失察於前又復任其藉詞抗延接任藩司劉清於孫燿之母具呈控訴時經成甯面交亦不據實揭參轉令承炆代爲消弭均屬不合除劉清見已降補員外郎外金應珩著交吏部議處餘著刑部覈議具奏○癸亥諭軍機大臣等章華宮本係西二所爲皇考高宗純皇帝潛龍舊邸至卽位後詔升爲宮實爲吉祥初地每歲新韶慶節嘉興臣工等樂衍廣吟數十年舉行盛軌乾隆五十年正月經欽奉諭旨以世世子孫惟當永遠奉守毋事更張至東五所爲年少皇子皇孫等公共所居

若照重華宮之例另行興建不特宮牆四圍別無隙地可以拓展亦非朕垂示後昆之意欽此 聖諭煌煌奕葉所當敬守朕從前爲皇子時所居之處如東華門內擷芳殿之中所宮內之東頭所二所福園門內之西北所見在卽仍准皇子等在彼居住惟毓慶宮係朕於乙卯九月仰蒙 皇考高宗純皇帝敕立皇太子後於是年十一月 特命由擷芳殿移居並蒙 賜額繼德堂 錫福凝祥始基於此迨丙辰元旦寅承大寶 訓政三年朕尙在此宮居住是則非東五所諸屋可比是以自嘉慶四年之後略加修葺以備幾餘臨蒞不復令皇子輩居住所以杜中外揣摩之漸不得不然我國家景運延洪繩繩萬禩將來衍祥紹慶我子孫有如朕之躬沐 鴻庥敕立爲皇太子者則仍可居住此宮用昭燕翼著將此旨交上書房敬謹存記並載入宮史續編世世遵守○丙寅

諭向來宮中門禁屢經降旨嚴定章程而於西苑等處尙未申明定制因思瀛臺之西苑門福華門悅心殿之承光左門承光右門陟山門闡福寺之西角門舊例王公大臣等俱至此下馬進內卽皇太子亦不得乘騎行走向俱敬謹遵循在王公大臣等恪守功令自不敢乘騎擅入惟恐伊等或因年老廢疾步履維艱藉端私行乘入此風斷不可開若果伊等難於行走不妨據實奏懇僅在門外伺候亦必俯准所請朕於耆臣未嘗不曲加優恤而體制攸關斷不可稍踰尺寸至御用馬匹本應在街市騎試亦不得藉試馬爲名擅騎出入儻經此次申禁後如有乘騎進內者著該班侍衛章京等攔阻若再不遵卽著稟知該管大臣指名參奏照違旨例治罪不貸將此通諭王公大臣等知之並著敕入宮史續編永遠遵行○周興岱卒以邵自昌爲左都御史轉秦瀛爲兵部左侍

郎以萬承風爲兵部右侍郎

田內闕

○乙亥孫全謀以捕盜延玩

奪職逮問

○戊寅以金應珩爲刑部右侍郎實授初彭齡山西巡

撫○辛巳諭本日刑部呈進秋審黃冊因四川省有由情實擬改

緩決絞犯王厚成一起另繕清單呈覽朕披閱之下其清單後尾

竟將直隸省另案由情實改緩決之絞犯梁二小一起清單黏接

錯誤當發交該堂官閱看茲據奏陳錯誤緣由請旨將堂司各官

一併交部嚴議實屬咎所應得朕日理萬幾至爲繁賾然於刑名

事件無不加意詳慎卽章牘稍多亦自始至終詳加披閱不遺一

字該衙門專辦刑名於陳奏要件更當如何慎重況此件清單止

有人犯一起篇葉不繁見在三扣之後所餘不過兩行如果略加

緝閱其誤立見又何能呈至朕前皆由該堂官等未知敬事不過

於定槩之後付之司官書吏等草草繕寫校對漠不關心迨至接

扣完畢伊等竟無一人覆加校閱者致有如此錯誤殊屬疏忽怠慢朕於尋常奏摺內閒有一二字誤寫雖隨時指出更正迨諸臣奏請處分時往往寬免若此次關繫刑名事件其怠玩之咎又豈能曲爲寬恕耶除令該堂司官查明接扣錯誤之書吏自行責處革退外大學士董誥在內延行走於本衙門奏章不及詳校其咎稍輕著加恩改爲交部議處此外刑部各堂官及承辦司官著交部分別嚴加議處○癸未諭本日召見刑部堂官金光悌朱理二人詢及前日所進四川省擬改緩決絞犯王厚成清單接扣舛誤該堂官等因何未經看出據伊二人奏稱向來定案奏稟俱交司官等繕寫校對卽行進呈各堂官從不覆看等語殊屬非是各衙門奏摺均係進呈披覽之件豈有各堂官全不寓目之理乃該堂官之意竟似一經定稟其校對正摺止係司官及書吏應辦之事

伊等分不當爲卽或遇有錯誤不過公同奏請處分迨交部懲處
伊等亦恬不愧懼此豈敬事之道嗣後各衙門進呈之件均著該
堂官等自行敬謹詳閱卽各堂官不能徧閱亦應輪出一二人檢
閱無誤然後恭遞設將來進呈之後看出錯誤詢問堂官中無人
閱看朕必從重懲處不稍寬貸○以吳芳培爲內閣學士

由詹事選

甲申諭方維甸奏洋盜朱渥悔罪乞降軍領夥眾三千餘人投出
並將船隻礮械全數呈繳請旨辦理一摺朱渥一幫匪船爲海洋
巨寇本年朱渥被官兵用礮擊斃伊弟朱渥接管賊船卽心懷悔
懼亟思投首因候風停泊外洋今親身登岸率眾三千三百餘人
全行投出並呈繳海船四十二隻銅鐵礮八百餘門其餘器械全
數點收海洋盜賊其初本係內地良民或失業爲匪或被脅入夥
日久自知罪重不能湔洗自投今朱渥真心悔懼率眾投誠與始

終怙惡者不同朕仰體上天好生之德念此三千餘眾悔罪求生加恩悉予矜全准其投首且洋面早一日除此巨寇免致爲害商民所全亦復不少著卽照該督所請查照舊例分別遣散同籍安插交地方官查傳鄉保親族人等嚴加管束並徧行曉諭伊等身犯重罪今准投首更生從此倍當安分如再犯法定行加倍治罪其情願隨同緝捕者經該督等挑出精壯一百五十餘人同頭目四十餘人著准其分派兵船隨同出洋緝捕所有派撥弁兵運送礮械以及雇用船隻各遣各費准其於從前撥往臺灣備賞餘存銀三萬八千餘兩項內動支報部覈銷

十二月庚寅漕運總督馬慧裕以前在河東河道總督任內不能蓄水濟運致回空漕船凍阻降三品頂帶尋命來京以三品京堂補用○辛卯以許兆椿爲漕運總督錢楷爲廣西巡撫蔣繼勳爲

河南布政使陳觀爲浙江按察使

由福建鹽道遷

○壬辰兩江總督阿林

保卒予祭葬諡敬敏○調松筠爲兩江總督以那彥成爲陝甘總

督

由喀什噶爾參贊大臣遷

○乙未諭朕恭閱

世宗憲皇帝實錄內載雍正

二年五月欽奉

諭旨朕惟漕運關係甚大經費本無不敷而運

丁徭行不法者皆由官弁剝削所致如開兌之時糧道發給錢糧

任意剋扣而僉丁之都司監兌之通判又多誅求及至啓行沿途

武弁借催糧爲名百計需索又過淮盤查私貨徒滋擾累運丁力

不能支因而盜賣漕糧偷竊爲匪嗣後各督撫不時查察如有仍

前需索等弊立即指參從重治罪庶運丁漸有起色保守身家懷

遵約束禁官吏之侵削卽所以戢旗丁之刁悍等因欽此

聖訓

煌煌尋源探本可見當日漕運之弊與目前情形正同而所以整

飭而釐剔者數十年以後之措施早垂

成憲近日有漕省分諸

督撫指陳漕弊無非稱旗丁等提溜打關等項費用繁多其所謂設法調劑者無非多給兌費殊不知弊端之大費用之廣總由糧道之剋扣於先弁員之需索於後至提溜打關等項未嘗不稍有所費而丁力之不足實在此不在彼也旗丁等花費既多復隱有自肥之計一遇交兌之際藉端訛索毫無忌憚甚且沿途盜賣米石而州縣官既爲旗丁所苦復藉旗丁爲名當徵收之時多方浮折其實在受累者惟花戶而已是則恤民之道全在恤丁而裁弊之源必須裁費前經屢降諭旨將各衙門需索款項並糧道剋扣舊習一切禁革淨盡仍交該督撫嚴查密訪若再有隱蹈前轍者務當據實糾參從重治罪使旗丁刁悍之習不戢自除州縣苛斂之風不禁自止漕運庶日有起色也懷之○丁酉諭那彥成著兼兵部侍郎銜嗣後凡遇以二品頂帶授爲總督者均著兼侍郎銜

俟加恩給予頭品頂帶吏部再行奏請兼兵部尙書銜著爲例○
戊戌諭軍機大臣會同刑部審訊書吏王書常等私雕假印捏指
工程冒領庫銀一案見據拏獲各犯供辭查出假印文領計冒領
得贓已有八次之多閱之殊深憤懣近來部院衙門堂司各官於
一切奏牘文移不但不細心詳覈竟全不看視殊屬疲玩之至前
月刑部於進呈案由清單卽有錯黏尾扣之事今內務府於偽造
工部假印文領屢次照文給發毫無覺察此在總管內務府大臣
各員怠玩不職均屬咎無可辭而蘇楞額阿明阿二人見係工部
堂官兩處文彙俱應閱看使於內務府給發銀款時思及工部衙
門並未具奏此件一加查覈何難立破其奸乃被欺多次若謂閱
看時前後俱未看出則是昏愒糊塗如竟未寓目更全不以公事
爲重直同瞽目深負朕恩豈堪復勝部院之任蘇楞額阿明阿俱

著卽行革職仍交軍機大臣會同刑部議罪英和常福和世泰俱著先行拔去花翎仍交部嚴加議處徵瑞本年三月甫經補放又放差在外兩月情稍可原著交部議處其廣儲司銀庫司員等著查明奏請治罪至工部堂官失察書吏鋪戶舞弊卽由私雕與盜用堂印者稍有不同所有工部堂官任事較久者著交部議處其本年到部者著交部察議各部院大臣俱經朕簡用委任嗣後務各殫心厥職剔弊釐奸振刷精神時以此案爲戒朕一秉大公不肯稍有瞻顧若再因循怠忽是自干咎戾惟執法重懲耳慎之○辛丑諭軍機大臣會同刑部將書吏王書常等嚴加究鞠又訊出該犯等於嘉慶十一年至本年九月止復先後朋謀僞造印文捏款移咨戶部經戶部憑文辦札及交庫陸續冒領三庫銀兩物料共計六次更堪駭異除嚴審定擬外並令將戶部堂官失察次數

開單呈覽大學士祿康失察共有六次伊總理度支於錢糧出納分應倍加詳慎何以漫不經心毫無覺察尚書德瑛失察亦係六次且札庫先行彙經伊畫諾者三此等文彙並非緊要事件何道不及待之有再前日召見據伊奏稱近日因目力不濟所有彙案曾令伊子代畫筆蹟閒有互異並稱進署日多是以先行彙俱係伊閱畫但不察用項之緩急率畫先行此非勤職乃冒昧受人愚弄耳似此精神不能振作目力昏花豈復能勝尙書之任均應量予降補見在長麟久患目疾已閱半載未能剋期痊癒著將協辦大學士開缺祿康著革去太子少保銜降補協辦大學士授爲戶部尙書德瑛著革去太子少保銜降補工部左侍郎俱仍交部嚴加議處戴衡亨失察四次趙秉冲失察五次較祿康德瑛俱少況伊二人供職內廷不能常川到署著交部議處劉鐸之失察四次

又未盡橐著交部議處曹振鏞失察一次托津失察二次英和失
察二次桂芳失察一次均著交部察議其失察四次之蘇楞額前
已鐫職無庸再交部議祿康所出大學士一缺著勒保補授仍留
四川總督之任所有工部尙書員缺著秀林補授○癸卯特克慎
以年老休致以王集爲左都御史由都統題○乙巳成甯以巡撫山西
時擾累州縣革職調初彭齡爲陝西巡撫以衡齡爲山西巡撫曾
煥爲廣東布政使周季堂爲湖北按察使由江西道題○調陳桂生爲
山西按察使積耶阿爲甘肅按察使○己酉諭初彭齡等奏晉省
士民望幸情殷籲請允舉巡幸一摺五臺爲晉省勝蹟其山近臨
塞垣蒙古藩部歲時瞻禮絡繹僭來從前 聖祖仁皇帝 高宗
純皇帝屢次親臨卽藉以爲民祈福朕昔在藩邸隨侍 高宗純
皇帝巡幸各處惟五臺未曾登陟言念茲山靈泉奧區久留 聖

蹟今既該省士民同殷望幸自應俯如所請著於嘉慶十六年春三月朕恭謁西陵後即便遣巡幸五臺所有一切應行事宜各該衙門照例敬謹豫備○庚戌諭吏部等衙門奏議處失察假印冒領庫款案內戶工二部及管理三庫各堂官二摺部院各衙門大臣位崇責重於經管事務分應盡心綜覈今蔡泳受王書常等私雕假印冒領庫款一案舞弊至十四次之多設於初起時各該管大員等有一二人精明詳察燭破其奸立時查拏懲辦則罹法者必不至如此之眾而承辦各職官亦不至嚴譴多人乃相率因循竟無一人能除奸剔弊者經部臣分別覈議其各至降革各員本應悉照部議但一時更易多員乏人簡補惟其中情節較重者亦不能不降黜數員以儆疲玩所有戶部各堂官內祿康前已降為協辦大學士尙書其部議降二級調用著從寬改為降三級留

任德瑛三次標置先行彙件伊雖常川到署人皆以其年老易於愚弄釀成重案其誤公之咎更甚於曠公前已降補工部侍郎伊精力已衰著卽以二品頂帶休致戴衡亨趙秉冲劉鏗之部議各降一級調用俱著從寬改爲降二級留任工部各堂官內費滄係管理工部兼管三庫事務於僞印文領到庫時並不能憶及工部無此奏案其咎與英和常福相等且伊在工部最久失察次數亦最多前已拔去花翎退出工部今部議革任著革去宮銜降爲侍郎萬承風見出學差兵部右侍郎一缺卽著費滄署理仍留兼管國子監事務曹振鏞成書蔣予蒲部議各降二級調用俱著改爲降三級留任陳希曾顧德慶部議各降一級調用俱著改爲降二級留任其原擬降留罰俸各員均著照部議行大學士一缺吏部無庸進本候朕簡員補授工部左侍郎員缺著福慶轉補右侍郎

員缺著榮麟調補正紅旗漢軍副都統並著榮麟補授盛京戶部
侍郎員缺著馬慧裕補授奉天府尹事務卽著馬慧裕兼管此案
甚奇朕所恨者不在書吏誣騙多次而在諸大臣及取司員之因
循疲玩方今大弊無出此四字者若不各加儆省其患更百倍於
此案矣朕惟思艱圖易以待諸臣之洗心滌慮助朕成一代令主
亦無可再諭矣將此旨通諭中外知之○諭禮部議覆董教增奏
達年世僕請分別開豁一摺所議尙未允協安徽省徽州甯國池
州三府向有世僕名目查其典身賣身文契率稱遺失無存考其
服役出戶年分亦俱無從指實特遇其有捐監應考等事則以分
別良賤爲辭疊行許控而被控之家戶族蕃衍又不肯悉甘污賤
案牘繁滋互相仇恨允宜覈實持平以端風化前據董教增奏世
僕惟以見在服役爲斷見在服役者如主家放出三代後所生子

孫方准捐考若事在前代卽曾經葬田主之山佃田主之田而出戶已百餘年及數百年者一體開豁爲良立論甚爲允當今禮部議令自國初以後雖見在不與奴僕爲婚並未報官存案者令地方官隨案查明以立案之日起限俟三代後所生子孫方准捐考恐紛紛查辦胥吏從中指勒轉滋流弊著仍照董教增所奏該處世僕名分統以見在是否服役爲斷以示限制若年遠文契無可考據並非見在服役養者雖經葬田主之山及佃田主之田著一體開豁爲良以清流品○刑部奏毆斃婢女革職擬徒前任編修汪庚呈請贖罪得旨汪庚鞭毆十歲婢女致斃情殊殘忍特以主僕名分罪止杖徒茲呈請贖罪若准令納贖則官員恣行酷暴者無所懲戒汪庚著不准其贖罪○癸丑論百齡等奏洋匪郭婆帶率同夥眾五千餘人擒獻張逆匪夥三百餘名呈繳船九十餘

隻礮四百餘位悔罪投誠一摺粵洋各股盜匪惟郭婆帶與張保仔兩股船數最多滋事已久今郭婆帶心存畏懼蓄意投誠張逆屢次邀令幫助俱不赴援兼與張逆併力鬪戰見據摺內奏稱轉據歸善縣稟報郭婆帶竟將張逆夥黨殺斃不計其數擒獲三百餘名奪獲張逆匪船十一隻率其夥眾五千餘人大小船七十餘隻大小礮四百餘位一併收入平海內港赴官呈獻投誠等語前此閩省奏到朱渥幫船投首一事止將船隻礮位呈繳未能擒殺盜夥今郭婆帶將張逆幫夥大加擒斬奪獲多船到官呈獻其真實投首之意尤爲確然無疑此時百齡親往查辦著卽准其投首並加恩將郭婆帶卽郭學顯賞給把總令其隨同捕盜如伊能將張保仔擒斬尙當格外施恩又盜首東海霸幫夥陳勝等四百餘人見已帶領船隻礮械一同投首所有郭婆帶等呈繳礮位船隻

均著留充官用廣東捕務廢弛已久洋匪劫掠橫行毫無忌憚自百齡到任之後認真整頓嚴斷接濟簡練舟師用能壁壘一新俾賊胆膽寒見在郭婆帶及東海霸率眾投誠並督飭舟師及地方官兩次追剿盡斃賊船大小頭目二十餘名殲賊六百餘名並擊斃賊首鄭一嫂之姪生擒盜夥七名燒毀盜船八隻擊壞盜船十四隻官兵兵丁人人效命大挫賊鋒事機順利此外內河積年兇盜向來爲害商民者亦經督飭地方官擒拏分別審辦本日摺內卽有一百二十餘名可見其辦理認真無少疏懈實爲出力可嘉百齡著加恩賞戴花翎以示獎勵該督惟當倍加奮勉將此時撫勦事宜分別妥辦以靖海洋茂承恩眷至孫全謀前因其在赤滌角勦賊鬆勁號令不嚴致賊逃遁降旨革職等因治罪解交刑部用嚴師律今該督摺內稱孫全謀自知悔悛此二次裁勦逆匪身

先將士因能斃賊毀船經該督查詢確實並無虛捏自可稍贖前愆孫全謀著加恩免其鞫問留於廣東效力贖罪如能倍加愧奮則將來尙可施恩儘再畏蒞如前當卽嚴參加倍治罪並著百齡隨時察覈據實具奏其署遊擊之守備黃振烈署守備之千總蔡振華因焚攻賊船火勢猛烈以致延燒坐船同時陣亡殊可嘉憫著加恩咨部賜卹○是歲朝鮮琉球越南暹羅南掌來貢○會計天下民數數各省通共大小男婦三萬五千二百九十萬二十四名口各省通共存倉米穀三千三百五十二萬八千八百五十三石六升八合九勺